

MUSEO HISTORICO DI ARUBA DEN PROCESO DI RENOBACION

ORANJESTAD (AAN) - Museo Historico di Aruba na Fort Zoutman ta den proceso di renobacion actualmente.

Ta asina cu dia 16 di Maart 1992, Fundacion Museo Arubano a worde lanta, cu e meta di maneha, cuida y purba retene monumentonan cultural e historico den e sentido mas amplio di palabra. Tambe hunto cu esaki, duna informacion cu ta pertenece na e monumento, ya cu tur monumento tin semper un historia tras di dje.

Otro tarea ta pa lanta interes di pueblo Arubano relaciona cu museonan e historia di Aruba. E trabao di renobacion di Museo Historico lo bay dura por lo menos un aña of mas, y el a cuminsa na November aña pasa.

E fundacion ta depende di e financiamiento pa por caba cu

e obra aki.

E museo ta cera for di November, pero e fundacion a manda pidi gobierno pa subsidia salario di un persona, esta Gini Croes, pa encarga cu e museo mas pronto cu ta posible.

Dependiendo di esaki e fundacion lo haya sa ki dia e ta habri, ora cu e trabaonan di renobacion ta cla.

Riba nombracion di e museologa y conservadora, e fundacion a manda gobierno dos carta pidiendo subsidio, pero te awo nan no a ricibi contesta.

Plannan pa futuro ta pa habri e museo cu un coleccion historico di Aruba, y for di e coleccion e publico por siña y lesa e historia di Aruba cronologicamente.

Es decir pa e publico haya sa con Aruba a nace, y con su

evolucion a bay. Tambe nan kier traha diferente publicacion tocante historia y arte di antes, y nan ta den contacto cu Museo Arqueologico. Nan no tin ainda contacto cu archivo historico cual lo bira parti di e tarea di e museologa.

Otro plan di futuro ta pa e fundacion traha cu hubentud di schoolnan pa asina constitui e desaroyo di conciencia nacional, loke sigur ta un proyecto di aplaudi.

Pa logra tur esaki nan mester di cooperacion di e pueblo Arubiano. Nan kier pa e museo duna un bista na e bishitante local y stranhero con Aruba tabata ta den pasado y con e ta awor.

Srta. Susan Dellange, Secretaria di e Fundacion, den conversacion cu DIARIO a proporciona e informacion aki.